

Ahad, 4 Oktober 2015

### **1. 200,000 siswazah berijazah menganggur**

IPOH 3 Okt. - Lebih 200,000 siswazah berijazah institusi pengajian tinggi (IPT) di negara ini masih gagal mendapatkan pekerjaan walaupun telah menamatkan pengajian masing-masing sejak dua tahun lalu.

Pengarah Eksekutif Persekutuan Majikan-Majikan Malaysia (MEF), Datuk Shamsuddin Bardan berkata, angka tersebut tidak termasuk bilangan siswazah yang bakal menamatkan pengajian tahun ini.

Tegas Shamsuddin, pihak kerajaan dan swasta perlu memainkan peranan dalam memastikan jumlah siswazah menganggur yang semakin membimbangkan itu dapat dikurangkan.

"Krisis ini sebenarnya bermula pada 2013 apabila kerajaan meningkatkan umur bersara, jadi pihak swasta tidak dapat mengambil pekerja baharu untuk menggantikan mereka yang sepatutnya bersara.

"Pada tahun ini pula, kerajaan telah menghentikan pengambilan pekerja sehingga menutup peluang kira-kira 13,000 hingga 15,000 pekerjaan di sektor awam dan di sektor swasta pula, keupayaan kita untuk mengambil pekerja agak terkekang kerana ekonomi tidak menentu.

"Kebanyakan syarikat sekarang mengambil pendekatan tunggu dan lihat kerana mereka tidak tahu apa akan berlaku pada masa hadapan selain turut terpaksa memberhentikan pekerja masing-masing," katanya pada sidang akhbar selepas menyampaikan ucapan pada Kolokium Pekerja anjuran DAP di sini, hari ini.

Menurut Shamsuddin, antara punca yang dikenal pasti menyebabkan siswazah berkenaan masih gagal mendapatkan pekerjaan berikutnya kelemahan mereka berbahasa Inggeris selain penampilan yang kurang menarik.

Katanya, kelompok tersebut juga kebanyakannya merupakan siswazah yang berasal dari kawasan pedalaman.

"Kebanyakan siswazah terlibat adalah terdiri daripada mereka yang tidak fasih berbahasa Inggeris dan datang dari kampung yang mungkin penampilan mereka itu agak kurang daripada mereka yang datang daripada keluarga dari bandar atau sebagainya."

"Perkara ini sebenarnya akan menimbulkan banyak masalah sosial. Jadi saya harap kerajaan dapat memberi insentif tertentu kepada majikan agar mereka tidak mengurangkan pekerjanya selain kepada majikan yang sanggup mengambil siswazah biarpun mereka ini telah lama menamatkan pengajian masing-masing," katanya.

Sementara itu, Shamsuddin memberitahu, sehingga kini hampir 10,000 pekerja telah diberhentikan di negara ini sejak Januari hingga Julai lalu.

Katanya, jumlah itu dilihat akan semakin bertambah berikutan keadaan ekonomi negara yang dijangka tidak banyak berubah sehingga awal tahun hadapan.

"Selain 10,000 pekerja itu, pihak lain seperti Shell sebagai contoh juga telah membuat pengumuman akan memberhentikan kira-kira 1,600 pekerja dalam masa dua tahun akan datang. Begitu juga Hewlett Packard seramai 30,000 pekerjanya di seluruh dunia.

"Kalau majikan tidak mampu mengekalkan perniagaannya, kita akan lihat lebih banyak pemberhentian pekerja selepas ini. Jadi, sebab itu saya harap kerajaan segera bertindak menjadi pengantara dengan beberapa dorongan kepada majikan supaya keadaan ini tidak menjadi lebih teruk," katanya.



Selasa, 6 Oktober 2015

## 2. Tempoh khidmat doktor pakar ditambah - Hilmi

KOTA KINABALU 5 Okt. - Kementerian Kesihatan merancang untuk menambah tempoh perjanjian perkhidmatan bagi doktor pakar dan pengamal perubatan yang pernah menerima tajaan atau biasiswa pendidikan kerajaan.

Timbalan Menterinya, Datuk Seri Dr. Hilmi Yahaya berkata, keputusan itu bagi membolehkan mereka terus berkhidmat di hospital kerajaan dengan kepakaran yang dimiliki demi kesejahteraan rakyat.

Malah tegas beliau, hal demikian dinilai semula ekoran fenome-na 'brain drain' dalam kalangan doktor, doktor pakar dan pengamal perubatan yang membatalkan kontrak perjanjian sekali gus berhijrah ke hospital luar negara atau swasta.

"Setiap tahun, kita mengalami kekurangan pakar-pakar dari semua sektor. Sebagai contoh pakar jantung dan bius, mereka memilih untuk menamatkan kontrak perjanjian dengan membayar balik pampasan kepada kerajaan selepas menerima tawaran kerja di luar.

"Fenomena 'brain drain' ini bukan sahaja berlaku di Malaysia tetapi melibatkan beberapa negara lain. Kita juga sedang membandingkan situasi ini sama ada tempoh kontrak perjanjian per-khidmatan negara terlalu rendah atau sebaliknya," katanya.

Beliau berkata demikian kepada pemberita selepas merasmikan majlis Konvokesyen Institut Latihan Kementerian Kesihatan Malaysia Zon Sabah dan Sarawak 2015, di sini hari ini.

Dalam pada itu Hilmi memberitahu, kepaka-ran dan perkhidmatan kesihatan dari negara ini mendapat pengiktirafan negara luar apabila Arab Saudi memohon supaya Malaysia menghantar pasukan kesihatan berkhidmat di negara tersebut.

Perkara itu yang di-maklumkan dalam per-bincangan dengan rakan sejawatannya dari Arab Saudi baru-baru ini bagaimanapun tidak dapat dipenuhi ekoran Malaysia turut mengalami kekura-angan pa-sukan kesihatan yang lengkap terutama pakar perubatan.

"Pasaran kesihatan kita menerima permohonan tinggi dari negara Timur Tengah (Asia Barat). Tetapi kita tidak boleh menghantar pasukan kesihatan kita kerana masalah kekurangan yang dialami.

"Oleh sebab itu, kita mohon para pegawai atau kakitangan kementerian untuk menambah pengetahuan ke peringkat tinggi agar selepas bersara boleh ber-khidmat di luar. Bukan pada waktu perkhidmatan dalam kerajaan," katanya.



Khamis, 8 Oktober 2015

### 3. 1MDB: Junjung titah Raja-raja Melayu

KUALA LUMPUR 7 Okt. - Timbalan Presiden UMNO, Tan Sri Muhyiddin Yassin menyambut baik dan menjunjung kasih titah Raja-raja Melayu yang mahu kerajaan menyelesaikan secepat mungkin siasatan berkaitan dengan 1Malaysia Development Berhad (1MDB).

Beliau berkata, amatlah wajar bagi kerajaan dan pihak berkuasa menjunjung sepenuhnya titah Raja-raja Melayu tersebut dan membawa mereka yang terbabit ke muka pengadilan tanpa rasa takut atau pilih kasih.

Muhyiddin menambah, titah yang terkandung dalam kenyataan yang dikeluarkan oleh Penyimpan Mohor Besar Raja-raja, Datuk Seri Syed Danial Syed Ahmad semalam menunjukkan keprihatinan Raja-raja Melayu terhadap kewalutan 1MDB.

"Raja-raja Melayu pada kebiasaannya tidak mengeluarkan sebarang kenyataan kecuali melibatkan isu besar yang menyentuh kepentingan rakyat dan negara.

"Apabila Raja-raja Melayu bertitah mengenai isu 1MDB, ini menandakan 1MDB adalah satu isu yang amat besar pada hemat baginda sekalian," katanya dalam kenyataan melalui laman Facebook beliau hari ini.

Khamis, 8 Oktober 2015

#### 4. Pegawai 1MDB tidak lakukan kesalahan

##### Hasil penelitian terhadap kertas siasatan Bank negara

PUTRAJAYA 8 Okt. - Jabatan Peguam Negara mendapati tiada kesalahan dilakukan oleh pegawai 1Malaysia Development Berhad (1MDB) selepas mengkaji kertas siasatan Bank Negara terhadap syarikat tersebut.

Dalam satu kenyataan di sini hari ini, jabatan itu mengesahkan menerima kertas siasatan tersebut daripada Bank Negara pada 21 Ogos lalu.

"Kertas siasatan telah diteliti Timbalan Peguam Cara Negara I, Datuk Tun Abd. Majid Tun Hamzah yang membuat keputusan tiada kesalahan dilakukan oleh pegawai-pegawai 1MDB serta mengarahkan tiada tindakan lanjut perlu diambil.

"Kertas siasatan telah dipulangkan pada 11 September dan keputusan berkenaan turut dimaklumkan kepada Bank Negara pada hari yang sama," kata kenyataan itu.

Kenyataan itu dibuat bagi mengulas titah Majlis Raja-Raja Melayu yang mahu kerajaan menyelesaikan secepat mungkin siasatan berkaitan 1MDB dan mengambil tindakan tegas yang sewajarnya terhadap pihak-pihak yang terlibat.

Jabatan Peguam Negara seterusnya memaklumkan pada 1 Oktober lalu, Bank Negara telah meminta jabatan tersebut supaya mengkaji semula keputusan hasil siasatan yang telah dibuat.

"Selepas mempertimbangkan fakta bahawa tidak lagi ada bukti baharu, Peguam Negara memutuskan untuk mengekalkan keputusan awal. Dalam soal ini, Jabatan Peguam Negara ingin menyatakan bahawa laporan berita antara 12 September hingga hari ini bahawa kertas siasatan berada di jabatan ini dan perbincangan masih dijalankan adalah tidak tepat," jelas kenyataan itu.

Jabatan Peguam Negara turut memaklumkan, Polis Diraja Malaysia (PDRM) dan Suruhanjaya Pencegahan Rasuah Malaysia (SPRM) belum menyelesaikan siasatan berkaitan 1MDB kerana keterangan daripada beberapa saksi penting belum dirakamkan.

Jabatan itu turut menegaskan, pasukan petugas khas mengenai 1MDB tidak pernah dibubarkan dan siasatan yang sedang berjalan tidak pernah terhalang atau terhenti.

Isnin, 12 Oktober 2015

## 5. Isu 1MDB dikelirukan

KUALA LUMPUR 11 Okt. - Isu membabitkan 1Malaysia Development Berhad (1MDB) dilihat semakin mengelirukan berikutan terlalu banyak pihak yang tidak mempunyai kaitan mengeluarkan kenyataan yang sering kali bercanggah kerana dibuat berdasarkan andaian, khabar angin dan dengar cakap sahaja.

Menteri Komunikasi dan Multimedia, Datuk Seri Dr. Salleh Said Keruak berkata, dakwaan awal bahawa 1MDB telah 'menghilangkan' dana sebanyak RM42 bilion tiba-tiba berubah kepada 'ketelusan tidak mencukupi' dan 'tiada penjelasan yang betul'.

"Sedangkan 1MDB dan Peguam Negara telah mengeluarkan penjelasan (mengenai perkara ini) dan semua penjelasan ini ditolak," katanya dalam satu kenyataan di sini hari ini.

Beliau hairan mengapa Bank Negara membangkitkan mengenai isu kelulusan yang diberikan di antara tahun 2009 hingga 2011, yang didakwa dilakukan berdasarkan maklumat tidak lengkap.

Ini kerana katanya, pengurusan baharu telah mengambil alih 1MDB dan Kabinet telah meluluskan pembentangan rasionalisasi dan pengurangan hutang syarikat pada Jun 2015.

Ujar beliau, ini bermakna, isu-isu berbangkit pada tahun tersebut telah digantikan dengan perkara-perkara dipersetujui pada Jun 2015.

"Mengapa membangkitkan isu pada 2009-2011 yang telah pun digantikan pada Jun 2015 dan telah diluluskan Kabinet? "Adakah Bank Negara mempunyai lebih kuasa daripada Kabinet atau sebaliknya? Dan Bank Negara mahu mengatakan bahawa Kabinet terlalu jahil untuk diberikan amanah dalam menjalankan tugas membuat keputusan dan memberi kelulusan?" katanya.

Selasa, 13 Oktober 2015

#### 6. Abu Kassim akan jumpa tiga ketua pasukan petugas khas 1MDB

KUALA LUMPUR 12 Okt. - Ketua Pesuruhjaya Suruhanjaya Pencegahan Rasuah Malaysia (SPRM) akan mengadakan pertemuan dengan tiga ketua pasukan petugas khas yang bertanggungjawab menyiasat isu 1Malaysia Development Berhad (1MDB).

Mereka ialah Ketua Polis Negara, Tan Sri Khalid Abu Bakar; Gabenor Bank Negara, Tan Sri Zeti Akhtar Aziz dan Peguam Negara, Tan Sri Mohamad Apandi Ali.

Ketua Pesuruhjaya, Tan Sri Abu Kassim Mohamed berkata, pertemuan itu bagi mengaktifkan semula peranan pasukan petugas khas tersebut yang turut dianggotai SPM dalam menyelesaikan hal-hal yang berkaitan dengan 1MDB.

"Pasukan ini penting bagi membincangkan jalan penyelesaian dan keputusan dalam isu-isu yang timbul.

"Kita tidak kisah, kalau ada pertemuan memang saya hendak berjumpa dengan ketua-ketua jawatankuasa khas itu," katanya selepas Majlis Paluan Berundur dan Persaraan Timbalan Ketua Pesuruhjaya (Pengurusan dan Profesionalisme) SPM, Datuk Seri Zakaria Jaafar di Akademi Pencegahan Rasuah, Jalan Duta, di sini hari ini.

Beliau berkata demikian ketika diminta mengulas mengenai saranan Zakaria dalam ucapan persaraannya agar pasukan petugas khas itu diaktifkan semula.

Abu Kassim bagaimanapun tidak menyatakan bila beliau akan mengadakan pertemuan dengan ketiga-tiga pemimpin pasukan petugas khas berkenaan.

Sementara itu, Timbalan Ketua Pesuruhjaya (Pengurusan dan Profesionalisme) Suruhanjaya Pencegahan Rasuah Malaysia (SPRM), Datuk Seri Zakaria Jaafar berkata, pasukan petugas khas yang dipertanggungjawabkan untuk menyiasat isu membabitkan 1MDB perlu diaktifkan semula bagi membolehkan siasatan dijalankan dengan berkesan.

Zakaria yang bersara wajib hari ini berkata, sebuah panel khas perlu diwujudkan bagi mengkaji hasil siasatan yang berkaitan dengan isu 1MDB agar segala keputusan diambil adalah adil tanpa dipengaruhi oleh mana-mana pihak.

"Panel khas itu perlu dianggotai seorang bekas Peguam Negara, seorang bekas hakim dan seorang wakil daripada Majlis Peguam bagi menjalankan kajian terhadap keputusan siasatan yang melibatkan SRC International, dana RM2.6 bilion dan 1MDB.

"Peguam Negara mempunyai kuasa untuk melantik mana-mana pihak yang layak untuk bertindak membuat keputusan sama ada wujud kes atau tidak untuk didakwa di mahkamah. Perkara ini pernah dilakukan semasa bekas Peguam Negara disiasat oleh SPRM pada empat tahun lepas," katanya.



Isnin, 19 Oktober 2015

## 7. 1MDB beri penjelasan berhubung kenyataan salah

KUALA LUMPUR 18 Okt. - Syarikat pelaburan kerajaan, 1Malaysia Development Bhd. (1MDB) hari ini mengulangi matlamat utama pelaburan ekuiti AS\$1 bilion dalam PetroSaudi International (PSI) adalah untuk mendapatkan 40 peratus pegangan ekuiti, yang telah dicapai.

Semua dana yang dibayar oleh 1MDB adalah mengikut perjanjian-perjanjian yang dilaksanakan dengan sewajarnya dan tertakluk kepada setiap terma undang-undang, bayaran dibuat kepada akaun bank atas arahan PSI.

1MDB berkata demikian dalam satu kenyataan hari ini untuk menjelaskan lagi mengenai beberapa perkara memandangkan dakwaan lama dan gambaran tertentu maklumat yang dibangkitkan semula anggota Parlimen Petaling Jaya Utara, Tony Pua mengelirukan orang ramai.

PSI mengesahkan semua dana yang dipindahkan atas arahannya telah diterima dan tiada lagi baki hutang tertunggak dalam syarikat usaha sama, apabila 1MDB memperoleh pemilikan.

Semua maklumat berhubung pindahan itu, termasuk perjanjian berkaitan yang dilaksanakan dan aliran dana, dibentangkan kepada Lembaga Pengarah 1MDB.

Selain itu, adalah penting untuk menjelaskan bahawa nilai ekuiti keseluruhan dan pelaburan murabahah AS\$1.83 bilion oleh 1MDB dalam PSI akhirnya meningkat melalui satu siri urus niaga kepada AS\$2.33 bilion dalam bentuk unit dana setakat 31 Mac 2014.

"Kami telah menjelaskan, paling terbaru pada 10 Oktober 2015, bagaimana AS\$1.39 bilion daripada jumlah ini ditebus dalam tunai, meninggalkan baki AS\$940 juta dalam bentuk unit dana yang akan menjadi sebahagian daripada 'pertukaran hutang kepada aset' dengan International Petroleum Investment Company (IPIC) dari Abu Dhabi," tegas 1MDB.

1MDB turut menjelaskan dakwaan Pua bahawa syarikat itu memerlukan jaminan keluar adalah salah.

Syarikat itu berkata, penjualan Edra Global Energy Bhd. digabungkan dengan RM16 bilion 'pertukaran hutang kepada ekuiti' dengan IPIC yang diumumkan sebelum ini dan jualan ekuiti dalam Bandar Malaysia, akan mengurangkan hutang 1MDB sehingga RM42 bilion.

"Angka itu tidak termasuk tunai yang kami jangka akan dijana daripada jualan baki tanah di TRX, Pulau Indah dan di Pulau Pinang," katanya.

"Jika Pua benar-benar mahukan kebenaran, beliau sepatutnya membiarkan pihak berkuasa meneruskan siasatan mereka dan mengikut setiap proses, membahaskan keputusan tersebut dalam forum yang sewajarnya, seperti Jawatankuasa Kira-kira Wang Negara (PAC) dan Parlimen," menurut kenyataan itu. - BERNAMA



Isnin, 19 Oktober 2015

#### **8. Pelantikan pengerusi PAC yang baharu percepat siasatan 1MDB**

KUALA LUMPUR 19 Okt. - Menteri Pertahanan, Datuk Seri Hishammuddin Hussein yakin pelantikan pengerusi baharu Jawatankuasa Kira-kira Wang Negara (PAC) akan mempercepatkan penyelesaian terhadap keraguan dalam isu 1Malaysia Development Berhad (1MDB).

Beliau percaya pengerusi baharu PAC dan anggota jawatankuasanya akan melaksanakan tanggungjawab mereka dengan berkesan.

Orang ramai yang mahu isu 1MDB diselesaikan harus menunggu hasil siasatan PAC, kata Hishammuddin kepada pemberita di lobi Parlimen hari ini.

Dewan Rakyat meluluskan pelantikan Anggota Parlimen Rompin Datuk Hasan Arifin sebagai pengerusi baharu PAC hari ini, menggantikan Datuk Nur Jazlan Mohamed yang dilantik menjadi Timbalan Menteri Dalam Negeri.

Perkara itu dinyatakan dalam Aturan Urusan Mesyuarat dan Usul-usul Mesyuarat Ketiga, Penggal Ketiga Parlimen Ketiga Belas 2015 yang dimuat naik dalam Portal Rasmi Parlimen Malaysia, pada 16 Oktober lepas.

Sementara itu, Nur Jazlan yakin Hasan dapat menjalankan tanggungjawab berkenaan dengan baik.

Beliau juga berharap Hasan akan mendapat kerjasama sepenuhnya daripada semua parti yang menganggotai PAC supaya urusan yang tergendala sebelum ini dapat diteruskan.- BERNAMA

Selasa, 20 Oktober 2015

### **9. BNM beri penjelasan tindakan kuat kuasa pentadbiran**

KUALA LUMPUR 19 Okt. - Bank Negara Malaysia (BNM) akan mengambil tindakan penguatkuasaan, yang juga dikenali sebagai tindakan pentadbiran ke atas pihak yang didapati telah melanggar atau tidak mematuhi peraturan dan pengawalan di bawah undang-undang pengawalseliaan yang ditadbirnya.

BNM berkata, tindakan tersebut boleh diambil secara serentak atau secara berasingan dan berbeza daripada prosiding jenayah yang di bawah kuasa Peguam Negara sepenuhnya.

"Oleh itu, berasingan daripada sebarang keputusan berhubung dengan prosiding jenayah, BNM dibenarkan di bawah Akta Perkhidmatan Kewangan 2013 dan Akta Perkhidmatan Kewangan Islam 2013 untuk mengambil tindakan pentadbiran.

"Ini termasuk mengenakan penalti monetari, mengeluarkan arahan pematuhan, memberi bayaran balik kepada mana-mana individu yang tidak berpuas hati disebabkan oleh pelanggaran terhadap Akta, memberi amaran awam dan persendirian serta arahan supaya langkah-langkah diambil untuk mengurangkan atau menyelesaikan sesuatu pelanggaran terhadap Akta," katanya dalam kenyataan di sini hari ini.

Jelasnya, ia adalah bagi memastikan integriti dan keyakinan terhadap sistem kewangan negara. - BERNAMA

Rabu, 21 Oktober 2015

### **10. Isu hutang, aliran tunai 1MDB mampu diselesaikan**

KUALA LUMPUR 21 Okt. - 1Malaysia Development Bhd (1MDB) akan dapat membayar hutang dan menyelesaikan isu aliran tunainya jika pelan rasionalisasi yang sedang dijalankan dapat dilaksanakan tanpa halangan.

1MDB, syarikat pembangunan strategik milik penuh kerajaan, menempuh tempoh yang sangat mencabar, termasuk pelbagai siasatan, kata Perdana Menteri, Datuk Seri Najib Tun Razak.

Langkah konkret sedang dilaksanakan bagi menangani isu-isu ini, termasuk pelan rasionalisasi yang akan menurunkan paras hutangnya.

"Jika (pelan rasionalisasi) dibenarkan berjalan tanpa halangan, ia akan membolehkan syarikat membayar hutang dan menyelesaikan isu aliran tunai," katanya pada Forum Transformasi Global di sini hari ini.

Najib yang juga Menteri Kewangan berkata: "Kita perlu menunggu hasil siasatan, dan jika ada bukti salah laku, saya akan memastikan bahawa tindakan paling tegas akan diambil ke atas mereka yang bertanggungjawap."

Dari segi dakwaan salah laku, Najib berkata, ada banyak siasatan dilakukan, termasuk di Malaysia, 'yang saya sendiri arahkan.'

Dalam kenyataan baru-baru ini, 1MDB berkata, pelan rasionalisasi sedang dilaksanakan, seperti dirancang.

Asas pelan itu antara lain, termasuk 'hutang untuk tukaran aset' dengan International Petroleum Investment Company (IPIC), jualan ekuiti dalam Edra Energy, jualan ekuiti dalam Bandar Malaysia, jualan tanah di TRX dan pelupusan aset bukan teras.

Keuntungan daripada pelan rasionalisasi ini akhirnya akan mengurangkan hutang 1MDB, ke tahap mampan dan boleh diurus menjelang suku keempat 2015.

Antara lain, 1MDB berjaya menjual lebih RM1 bilion nilai tanah di Tun Razak Exchange tahun ini.

Akhirnya, bidaan terikat akan diterima daripada pembida domestik dan antarabangsa yang disenarai pendek bagi kedua-dua Edra Energy dan Bandar Malaysia antara pertengahan dan akhir Oktober 2015, dengan Perjanjian Jual Beli untuk kedua-dua aset dilaksanakan pada Disember 2015.

Menurut 1MDB, ia berjaya memenuhi, tanpa ingkar, obligasi perkhidmatan dan pembayaran faedah dan prinsipal, kepada peminjam domestik dan asing.

Kerajaan memberi jaminan ke atas RM5.8 bilion hutang 1MDB, dengan RM5 bilion matang pada 2039, dan menyediakan Surat Sokongan ke atas AS\$3 bilion terbitan bon oleh 1MDB, yang matang pada 2023.

Pada kadar tukaran semasa, jumlah prinsipal hutang jangka panjang ini bernilai kira-kira RM18.7 bilion, katanya.- BERNAMA

Rabu, 21 Oktober 2015

## 11. Wujudkan Farmasi Rakyat 1Malaysia

KUALA LUMPUR 20 Okt. - Kerajaan disaran mewujudkan farmasi berkonsep mesra rakyat dengan matlamat membekalkan ubat pada harga murah kepada orang ramai.

Datuk Irmohizam Ibrahim (BN-Kuala Selangor) berkata, inisiatif tersebut boleh dinamakan sebagai 'Farmasi Rakyat 1Malaysia'.

Menurut beliau, langkah mewujudkan farmasi berkenaan selaras dengan hasrat Perdana Menteri, Datuk Seri Najib Tun Razak untuk meringankan beban rakyat.

"Masalah kesihatan yang ringan dapat diatasi sekali gus mengembalikan kualiti kerja rakyat.

"Kewujudan farmasi ini juga membuktikan bahawa kerajaan amat prihatin dalam memastikan rakyat sentiasa sihat dan dapat menjalankan tugas dengan baik," katanya ketika membahaskan Rang Undang-undang Profesjon Kesihatan Bersekutu 2015 dalam sidang Dewan Rakyat hari ini.

Irmohizam menambah, kawasan pedalaman seharusnya diberi keutamaan dari segi pemilihan lokasi bagi memudahkan penduduk setempat menerima manfaat daripada farmasi tersebut.

Beliau memberitahu, pesakit yang menerima preskripsi ubat daripada doktor bertauliah juga boleh mengunjungi farmasi berkenaan tanpa perlu ke klinik atau hospital untuk mengambil ubat.

Khamis, 22 Oktober 2015

## 12. Firma audit antarabangsa audit asset Mara - Annuar Musa

KUALA LUMPUR 22 Okt. - Majlis Amanah Rakyat (Mara) mendapatkan khidmat syarikat audit antarabangsa untuk mengaudit proses pembelian semua asetnya termasuk pembelian harta tanah di Australia.

Pengerusinya, Tan Sri Annuar Musa berkata, firma itu akan menjalankan audit daripada seluruh aspek dengan terperinci termasuk audit forensik.

Di samping siasatan pihak polis dan Suruhanjaya Pencegahan Rasuah (SPRM) serta audit dalaman, audit luaran amat penting kerana Mara mempunyai kebatasan dari segi kepakaran, katanya pada sidang akhbar di lobi Parlimen di sini hari ini.

Dalam pada itu, Annuar yang juga Anggota Parlimen Ketereh turut mengulas dakwaan Anggota Parlimen Pandan Rafizi Ramli baru-baru ini yang menyatakan pegawai tinggi Mara yang disebut dalam proses perbicaraan di Australia masih belum diambil tindakan atau didakwa.

"Tidak ada sesiapa pun yang didakwa terlibat, cuma kita dapati ada nama-nama tertentu disebut ... kalau sebut (nama) sahaja kita tidak boleh anggap orang itu salah kerana itu tak adil," katanya. - BERNAMA



Khamis, 22 Oktober 2015

### 13. Arul sahut cabaran Tony Pua

KUALA LUMPUR 29 Okt. - Presiden dan Pengarah Eksekutif Kumpulan 1Malaysia Development Bhd. (1MDB), Arul Kanda Kandasamy menyahut cabaran Setiausaha Publisiti Kebangsaan DAP, Tony Pua untuk bersama dalam satu program bual bicara siaran langsung bagi menjawab segala persoalan mengenai 1MDB.

Bagaimanapun, menurut Arul Kanda, Tony yang juga merupakan Ahli Parlimen Petaling Jaya Utara perlu terlebih dahulu meletakkan jawatan sebagai Ahli Jawatankuasa Kira-Kira Wang Negara (PAC). "Semua sedia maklum bahawa Tony adalah ahli PAC, yang sedang menjalankan siasatan terhadap 1MDB.

"Bagi menjamin integriti siasatan PAC dan mengelak sebarang konflik kepentingan, Tony mesti meletakkan jawatan daripada PAC terlebih dahulu," katanya dalam satu kenyataan di sini hari ini.

Tony dalam satu kenyataan semalam mencabar Arul Kanda untuk bersama dengannya dalam satu program bual bicara siaran langsung bagi menjawab persoalan-persoalan daripadanya mengenai 1MDB. Menurut Arul Kanda, meskipun Tony sanggup melakukan perkara demikian, beliau mengingatkan yang Tony tidak boleh menjadi hakim, juri dan algojo.

"Saya percaya beliau (Tony) mempunyai keberanian untuk melakukan perkara yang betul dan meletakkan jawatan daripada PAC supaya kita boleh mendapat perbincangan tanpa sebarang selindung di siaran langsung televisyen.". Katanya.

Sementara itu, Tony dalam reaksi terhadap kenyataan Arul Kanda itu, cuba menegakkan benang yang basah apabila mendakwa beliau tiada mempunyai konflik kepentingan untuk rancangan bual bicara tersebut walaupun merupakan ahli PAC.

"Kenapa hendak mengarut tentang hubungan antara saya berada dalam PAC dan Arul Kanda memberi jawapan jujur terhadap pembayar-pembayar cukai Malaysia", katanya dalam satu kenyataan di laman Facebook miliknya.

Tony juga secara kasar memperlekehkan Arul Kanda sebagai pengecut dan penakut berikut cabaran yang diberikan terhadapnya untuk meletakkan jawatan sebagai ahli PAC terlebih dahulu.



Jumaat, 23 Oktober 2015

#### 14. PDRM dilengkappan aset tempur baharu RM535.7j

KUALA LUMPUR 22 Okt. - Kementerian Dalam Negeri hari ini menandatangani lapan kontrak perolehan dan sewaan berjumlah lebih RM315.9 juta dalam usaha kerajaan mempertingkatkan lagi aspek keselamatan negara.

Kontrak tersebut termasuklah pembelian dua buah helikopter moden jenis Agusta Westland AW139 serta lapan kenderaan tempur berperisai 4x4 jenis IAG Jaws untuk kegunaan Polis Diraja Malaysia (PDRM).

Dua surat setuju terima (LoA) penyelenggaraan pesawat 350 King Air milik PDRM bernilai RM82.7 juta dan percetakan kertas saman trafik oleh Percetakan Nasional Malaysia Berhad (PNMB) bernilai RM20.9 juta turut dipersetujui menjadikan jumlah keseluruhan perjanjian adalah RM535.7 juta.

Selain itu, satu memorandum persefahaman (MoU) antara syarikat pertahanan Jerman, EMT Penzburg dengan syarikat tempatan, Drei Sohne Technologies Sdn. Bhd. (DST) bagi menghasilkan pesawat tanpa pemandu (UAV) Malaysia juga ditandatangani.

Kesemua perjanjian perolehan dan sewaan itu disaksikan Timbalan Perdana Menteri, Datuk Seri Dr. Ahmad Zahid Hamidi yang juga Menteri Dalam Negeri sempena Persidangan dan Pameran Khas Polis Asia (GPEC) 2015.

Dalam majlis itu, Kementerian Dalam Negeri diwakili Ketua Setiausaha, Datuk Seri Alwi Ibrahim.

Dua helikopter AW139 yang akan dioperasikan Unit Udara PDRM itu dibekalkan Galaxy Helicopters (M) Sdn. Bhd., manakala lapan kenderaan tempur IAG Jaws yang dipercayai akan digunakan di Kawasan Keselamatan Khas Pantai Timur Sabah (Esscom) dibekalkan Global Komited Sdn. Bhd.

Yang turut tersenarai dalam kontrak perolehan itu ialah pembekalan alat pemantauan elektronik (EMD) oleh Ujud Sentosa Sdn. Bhd. bagi kegunaan ke atas tahanan Akta Kesalahan Keselamatan (Langkah-langkah Khas) 2012 (SOSMA) dan Akta Pencegahan Jenayah (POCA).

Tidak terkecuali ialah pembelian raifal tempur Colt M4 dengan peluru berkaliber 5.56 milimeter yang dihasilkan syarikat pertahanan tempatan, SME Ordnance Sdn. Bhd. bagi kegunaan anggota polis.

Bagi kontrak sewaan pula, kementerian itu menandatangani perjanjian dengan syarikat penerbangan Malaysia Airlines Berhad (MAB) dan AirAsia Berhad (AirAsia) untuk operasi-operasi khas.



Sabtu, 31 Oktober 2015

### 15. Khidmat pegawai boleh ditamatkan awal

PUTRAJAYA 31 Okt. - Kerajaan akan memperkenalkan satu mekanisme baharu yang membolehkan perkhidmatan pegawai kerajaan berprestasi rendah ditamatkan lebih awal.

Ketua Pengarah Perkhidmatan Awam, Tan Sri Mohamad Zabidi Zainal berkata, mekanisme baharu yang dikenali sebagai dasar pemisah atau exit policy itu bertujuan memastikan setiap penjawat awam memenuhi kehendak rakyat untuk mendapatkan perkhidmatan terbaik.

"Penjawat awam sebagai tulang belakang dan penggerak utama kepada setiap dasar dan polisi yang telah diputuskan oleh kerajaan, mereka wajar memiliki integriti dengan cerminan produktiviti yang tinggi," katanya dalam kenyataan di sini hari ini.

Dalam pada itu, mengulas mengenai Bajet 2016, beliau mengajak seluruh penjawat awam untuk menzahirkan rasa bersyukur atas keprihatinan kerajaan dalam memperuntukkan pelbagai insentif kepada sektor terbabit.

Katanya, dalam bajet tersebut kerajaan telah meluluskan pemberian faedah pemindahan gaji bersamaan satu kenaikan gaji tahunan mengikut gred kepada 1.6 juta penjawat awam dengan peruntukan sebanyak RM1.1 bilion.

"Selain itu, dalam bajet tersebut turut disentuh mengenai penambahbaikan 252 skim perkhidmatan yang memberi faedah kepada 406,000 penjawat awam dan penetapan gaji permulaan terendah kepada RM1,200 sebulan yang akan memanfaatkan sebanyak 60,000 penjawat awam.

"Turut disentuh ialah mengenai pemberian khas penjawat awam sebanyak RM500 kepada semua penjawat awam dan RM250 kepada pesara awam yang mana kedua-dua bayaran ini berjumlah hampir RM1 bilion dan akan dibuat pada bulan Januari tahun hadapan," katanya.

Sementara itu, katanya, keprihatinan kerajaan dalam Bajet 2016 turut dizahirkan dengan memberi perhatian kepada kelompok B40 dan M40 menerusi beberapa pengumuman penting.

exit policy bertujuan memastikan penjawat awam penuhi kehendak rakyat.